

La ousc sciantiva de noscia jent

Su la Mediateca Ladina de l'ICL e tel program che va fora de vender domesdi a Radio Studio Record se pel scutèr la parlèda ladina de jent fascèna che no é più con nos

Lengaz - "No l'é più l'ladin de n'outa!" Cotanta outes aone sentù dir chest tant? Ben segur, l'ladin, desche duc i lengac, l'muda tel temp, l'se adata a dir roba neves, e no demò la paroles, ma ence la pronunzia no l'é più chela de jai egn. Ma ades duc chi che à gust de sentir la parlèda ladina sciantiva de noscia jent, i à l met de l fèr.

Defat l'Istitut Ladin à fat netèr fora e digitalisèr n grumon de veia registracions, documenc sonores de gran emportanza che ne porta dant conties, poejies, scric de prosa e intervistes registrèdes da fascegn da n'outa. Chisc documenc é stac metui su la "Mediateca Ladina" (<http://mediateca.ladina.it>) na piataforma web olache duc pel jir ite a veder, lejer, scutèr n muie de documenc per ladin.

Anter chisc mteriai, te la sezion che à inom "Oujes" se pel scutèr apontin la registracions de na lingia de fascegn: se pel sentir la parlèda sciantiva da Penia e da la Val de Sora de Simon de Giulio, Lis dal Vera, Zot de Rola, o chela più "empostèda" de don Massimiliano Mazzel; se pel scutèr i ditonghes da Soraga da la ousc de Rita del Baila, l moenat ascort del Canori e amò, te la conties dices sù per brach da Ermano Badia e da Giovanni Cechinol, se pel sentir con chela "c" particolare che oramai é dò a se perder fora ence sa Muncion.

Chi manco "tecnologics", che no à gran familiarità con internet, i pel scutèr n muie de chesta registracions ence a la radio, te n program de mesora sun Radio Studio Record che à per

titol "La ousc de noscia jent" e che vegn metù ensema da l'Union d Ladins de Fascia adum con l'Istitut Cultural Ladin per endrez de Fabio Chiocchetti e Lucia Gross. Chest program vel ge dèr luster a chi che dant da nos se à dat jù tel lurier al ben de nosc lengaz e che i ne à lascià desche arpejon n gran patrimoniè cultural, che nos anchecondi aon l doer de rencurèr, de fèr cognoscer e de trasmeter a la generacions che à da vegnir.

Dò na pruma lingia de 12 trasmiscions, olache se à podù scutèr anter i etres Giochele Stochier, Zot de Rola, l Canori e sia sor Veronica Gabana, don Mazzel, Simon de Giulio e Pio de Ciout, ades l'é stat endrezà n'otra lingia de trasmiscions, che ne permet de scutèr la oujes de Ermano



Su la Mediateca Ladina e a Radio Studio Record se pel scutèr la oujes de n muie de jent fascèna che no é più te anter de nos.

Badia, Giovanni Cechinol, Lis dal Vera e Rita del Baila. L program "La ousc de noscia jent" vegn manà fora da

Radio Studio Record de vender, da la does domesdi e en replica da mesa les nef da sera. (lg)